

ଯୋହନ ଲିଖିତ ପ୍ରଥମ ପତ୍ର **ଯୋହନ୍ ଲେକ୍ତାଦ୍ ପ୍ରତମ୍ ଚିଟି** **ଯୋହନ୍ ବଇ ବିଷୟରେ ଅଣ୍ଟୟ ପଦ୍**

ମୁନେଦ୍ ଯୋହନ୍‌ରେ ଚିଟି ଜିସୁ କ୍ରିଷ୍ଟନ୍ ଜନମ୍‌ରେ ପେର୍କେ ୫୦ ରୁ ୧୦୦ କ୍ରିଷ୍ଟାବ୍ଦ ଲୋପେ ପ୍ରେରିତ୍ ଯୋହନ୍‌ତଡ୍ ଲେକା ଆସ୍‌ମାଡ୍‌ରେ । ଯୋହନ୍ ନିଜେତିଙ୍ଗ୍ ଲେକକ୍ ଲେକାମ୍ ପରିଚୟ ଇଞ୍ଜିଣ୍ଟ, କିନ୍ତୁ ପ୍ରତମ୍ ଅଦ୍ୟାୟତାଗ୍ ଅଣ୍ଟ ଜିସୁ କ୍ରିଷ୍ଟନ୍ ଜିଞ୍ଜିଣ୍ଟ ନୁ ପୁନରୁତ୍ତାନରେ ଅଣ୍ଟ ଉଡ୍‌ତେନଣ୍ଟ ସାକ୍ଷି ଇଞ୍ଜି ପୁନ୍ଦାନଙ୍କ୍ ଆଦ୍‌ରେ ୧:୧-୩ । ପ୍ରତମ୍ ଯୋହନ୍ ଲେକା ଆଡ୍‌ତାଦ୍ ପ୍ରଣାଲି ଯୋହନ୍ ଲେକ୍ତାଦ୍ ସୁସମାଚାର ଲେକା ଆଡ୍‌ରେ ପ୍ରଣାଲି ଲେକାମ୍ ତନ୍ଦିତ୍ । ଇଦ୍ ବିଶ୍ୱାସ୍ ମାଡାନଙ୍କ୍ ଆଦ୍‌ରେ ଯେ ବେସୁର୍ ଅଣ୍ଟ ଏଫିସିତାଗ୍ ମାଡ୍‌ତଣ୍ଟ ଅଣ୍ଟ ଯୋହନ୍ ଲେକାଡ୍‌ତାଦ୍ ସୁସମାଚାର ମେଣ୍ଟେ ଯୋହନ୍ ତାଦ୍ ମୁଣ୍ଟ ଛୁଠି ଲେକିମାଡ୍‌ତନ୍ ଆଞ୍ଜୁ ୧ ଯୋହନ୍, ୨ ଯୋହନ୍, ୩ ଯୋହନ୍ ।

ଆଜ୍ଞାବାଦୀ କେସ୍ ମାନ୍ଦାନ୍ ମାନ୍ଦେ ନାରୁଡ୍ ତଡ୍ ମଣ୍ଡଲି ସମସ୍ୟା ଆଦାନ୍ ସମୟରେ ଯୋହନ୍ ସାରେ କ୍ରିଷ୍ଟାୟାନ୍ ନାରୁଡ୍‌କ୍ ଇଦ୍ ଚିଠି ଲେକିମାଡ୍‌ତନ୍ । ଅଡ୍ ବିଶ୍ୱାସ୍ ମାଡିତଡ୍ ଯେ, ଜିସୁ ନିଜାମ୍ ଝେରଣ୍ଟ ଇଶ୍ୱର୍ କିନ୍ତୁ ଜୁଗତ୍‌ତାଗ୍ ମାନ୍ଦାନ୍ ଝେଲେ ଅଣ୍ଟ ନେତୁର୍ ଆଞ୍ଜୁକ୍ ପଇସ୍ ମାନ୍ଦାନ୍ ନାରୁଣ୍ଟ ଆୟଣ୍ଟ । ଯୋହନ୍ ଜିସୁ କ୍ରିଷ୍ଟନ୍ ଉଡ୍‌ରେ ସାକ୍ଷି ମେଣ୍ଟେ ଅନ୍‌ଞ୍ଜାଦ୍ କାୟ୍ ଜିସୁଙ୍କ୍ ଇଟି ମାନ୍ଦାନ୍ ସେଙ୍ଗେ ଅଣ୍ଟ ଇଦ୍ ଲେକିତନ୍ ୧:୧-୩ । ଯୋହନ୍‌ରେ ଇଦ୍ ଚିଠି ଲେକାନାଲ୍‌ଦ୍ ବାଡେଙ୍କ୍‌କେ ଅଦୁଡ୍ ଅନାଦ୍ ଝେଡ୍‌କେ ପୁରା ମାଡାନାଦ୍ ୧ ଯୋହନ୍ ୧:୪ ମେଣ୍ଟେ ବିଶ୍ୱାସିଡ୍‌କିଙ୍କ୍ ପାପାମ୍‌ତାଗାଙ୍କ୍ ଝେରେ ମାଡାନ୍ ସେଙ୍ଗେ, ୧ ଯୋହନ୍ ୨:୧ ନୁ ମିର୍ ଶିକ୍ଷାତାଗାଙ୍କ୍ ବିଶ୍ୱାସିଡ୍‌କିଙ୍କ୍ ସୁରକ୍ଷା ଇଦାନଙ୍କ୍ ୧ ଯୋହନ୍ ୨:୨୬ ମେଣ୍ଟେ ବିଶ୍ୱାସିଡ୍‌କିଙ୍କ୍ ସୁରକିଡ୍ ଇଞ୍ଜି ନିଜାମ୍ ମାଡାନଙ୍କ୍ ୫:୧୩ ।

ବଇଡ୍ ଲୋପେ ମାନ୍ଦାନ୍ ମୁକ୍ୟ ବିଷୟ

୧. ଯୋହନ୍ ତାନ୍ ଚିଠିରେ ପରିଚୟ ଇଦାନ୍ ତଡ୍ ଲେକାଡାଦ୍ ଉଦେଶ୍ୟ ଲେକିତଣ୍ଟ । ୧:୧-୪

୨. ଇଶ୍ବର ବେଲା ଝେସ୍ ଆଦତଣ୍ଡ ବୁଜା ମାଡ଼ି ଜିସୁନ୍ ଲେକାମ୍
ଜିଝୁଣ୍ଡ ବାଦକାନଙ୍କ କେତିତନ୍ । ୧:୫-୩:୧୦
୩. ଇଶ୍ବରତିଙ୍କ ପ୍ରେମ ମାଡ଼ାନ୍ ବିଷୟ ମାନାଙ୍କ ମନେ ଖାଟିଦୁତଣ୍ ।
୩:୧୧-୫:୧୨
୪. ଅଣ୍ଡ ତାନ୍ ଲେକା ତେରସ୍ତିତଣ୍ । ୫:୧୩-୨୧

ଜିଝେ ମାନ୍ଦାନ୍ ବାକ୍ୟ

୧ ☆ ନାର୍ଗେ କାଲାକଞ୍ଜ ବେନ୍ ମିନ୍ଦେ, ଆଦ୍ ଜିଝେତେ ବାକ୍ୟ
ବିଷୟତେ ମାମେ ଲେକାନଙ୍କ ଅଦୁତମ୍ । ଅନ୍ ଗଟି ମାମେ କେଞ୍ଜତମ୍,
ଅଙ୍କ ମାମେ ଉଡ଼ତମ୍ ଇଦ୍ ନିଜାମ୍, ନିଜେଡ଼ କଣ୍ଡେତେ ଉଡ଼ତମ୍ ନୁ
ଅଙ୍କ ଇଡ଼ତମ୍ ।

୨ ☆ ଜିଝେତେ ଆଦ୍ ବାକ୍ୟ ବେସୁଙ୍କ ତଅନ୍ଦତେ, ମାମେ ଆଦିଙ୍କ
ଉଡ଼ତମ୍; ଆଦିଙ୍କ ଅଦିନ୍ ବିଷୟତେ ମାମେ ଇଦ୍ ଗଟି ସାକ୍ଷ୍ୟ ଇସ୍
କେସମିନ୍ଦେମ୍ ଯେ, ଅନନ୍ତ ଜିଝୁଣ୍ଡ ଲେକାମ୍ ଆ ବାବାଲ୍ ଇଶ୍ବର ତଡ଼୍,
ସାରେଦାମ୍ ମାନ୍ତେ ନୁ ଅଣ୍ଡ ମାନ୍ ଗାରେ ତଅନ୍ଦିମିନ୍ଦେଣ୍ ।

୩ ବାତେ ମାନାଡ଼ ନିଜାମ୍ତେ ଉଡ଼ତୁଡ଼୍ ନୁ କେଞ୍ଜୁତାଡ଼୍, ମାତର୍ ଆଦ୍
ଗଟ୍ ମିଇ ଗାରେ କେଡୁତମ୍ । ଇଦ୍ କେଞ୍ଜି ବାବାଲ୍ ଇଶ୍ବର ନୁ ତାନ୍
ମାର୍ ଜିସୁ କ୍ରିଷ୍ଟନ୍ ତଡ଼୍ ମାମେ ବେନ୍ ସାରେ ବିଷୟ ମିନ୍ଦେ, ଆଗେ
ମିଡ଼୍ ବାଗିଦାର୍ ଆଦତିଡ଼୍ ।

୪ ମାନ୍‌ଝାଦ୍ ଝେଡ଼କେ ବେଲାକି ପୁରା ଆଦ୍ତେ ଅଦିନ୍ ସେଙ୍ଗେ
ମାନାଡ଼୍ ଇଝୁସାରେ ଲେକୁତାଡ଼୍ ।

ଇଶ୍ବର ଆଦୁତଣ୍ଡ ଝେସ୍

୫ ଇଶ୍ବରତେ ମାର୍ ଜିସୁ କ୍ରିଷ୍ଟନାଗାଙ୍କ ମାମେ ବେନ୍ ଗଟି କେଞ୍ଜି
କେଡୁତମ୍, ଆଦ୍ ଅଦୁଡ଼, ଇଶ୍ବର ଆଦୁତଣ୍ଡ ଝେସ୍ ଅନାଗେ ଅଣ୍ଡୟ ବିନ୍ଦୁ
ମିକା ଇକାଡ଼୍ ଇଲେ ।

୬ ଅନ୍ ତଡ଼୍ ମାୟାଦ୍ ନିଜମ୍ ସଡ଼୍ ସମ୍ପର୍କ ମିନ୍ଦେ ଇଞ୍ଜ କେସ୍, ଯଦି
ଇକାଡ଼୍ତାଗ୍ ମାନ୍ତାଡ଼୍, ଗଟ୍ତେ ନୁ କାମ୍ତେ ମାନାଡ଼୍ ମିତ୍ୟାବାଦିଡ଼୍,
ଆଦ୍ତାଡ଼୍ ।

୭ ବାତେଙ୍କିକ୍‌କେ ଇଶ୍ବରତେ ଲେକାମ୍ ମାନାଡ଼୍, ଯଦି ଝେସିନାଗ୍ ମାନତାଡ଼୍, ମାନାଡ଼୍ ନିଜେ ନିଜର୍ ଲୋପେ ସାହାଯ୍ୟ ଦର୍କିତ୍ ନୁ ତାନ୍ ମାର୍ ଜିସୁନ୍ ନେତୁର୍ ମାନଙ୍କ ସାରେଡ଼ ପାପତାଗାଙ୍କ ପରିଷ୍କାର ମାଡ଼ିତେ ।

୮ ମାନାଡ଼୍, ଯଦି ନିଜେତିଙ୍କ ପାପିଆୟ ଇଞ୍ଜି ଏକେ ମାଡ଼କେ, ଆଲେକ୍ ନିଜେ ନିଜର୍ ଲୋପେ ମିର୍ କେତୁତାଡ଼୍ ମାନାଗେ ସୁଦୁର୍ ବା ସଡ଼ ଇଲେ ।

୯ ବାତେଙ୍କିକ୍‌କେ ଇଶ୍ବରତେ ଗାରେ ଯଦି ମାନାଦ୍ ପାପ୍ ସ୍ବୀକାର୍ ମାଡ଼ିତାଡ଼୍, ଇଶ୍ବର ତାନ୍ ଅନ୍ ଆଦେଶ୍ବତେ ମାନ୍ ପରୁ ନ୍ୟାୟତେ ବ୍ୟବହାର ମାଡ଼ିତନ୍ ଅଣ୍ ମାନ୍ ପାପ କ୍ଷମା ମାଡ଼ି ସାରେ ଅଦର୍ମତେ ମାନାଙ୍କ ପରିଷ୍କାର ମାଡ଼ାନଙ୍କ ବିଶ୍ବସ୍ତ ବା ନ୍ୟାୟବାନ୍ ଆଦତଣ୍ ।

୧୦ ମାନାଡ଼୍ ପାପ୍ ମାଡ଼ାଞ୍ଜାଡ଼୍ ଇଞ୍ଜି ଯଦି କେତିତାଡ଼୍, ଇଶ୍ବରତିଙ୍କ ମିତ୍ୟାବାଦି ଇଞ୍ଜି ଲିନ୍ଦେ ମାଡ଼ତୁଡ଼୍ ମେଣ୍ଟେ ଅନ୍ ବାକ୍ୟ ମାନ୍ ହୃଦୟତାଗ୍ ଇଲେ ।

୨

ତ୍ରାଣକର୍ତ୍ତାଙ୍କ ଜିସୁ

୧ ଆ ନା ପିଲାନତି, ମିକିଙ୍କ ନାୟାଦ୍ ଇଦ୍ ଚିଟି ଲେକେନାଦ୍ କାମ୍, ଇଦ୍ କାର୍‌ସ୍ ବେଲାନ୍ କି ମେଣ୍ଟେ ପାପ୍ ମାଡ଼ମାର୍ । ମେଣ୍ଟେ ମିଡ଼୍, ବେଲାନ୍ ପୁନ୍ତିଡ଼୍, ବେନ ଯଦି ପାପ୍ ମାଡ଼ିତନ୍, ମାନ୍ ସେଙ୍ଗେ ବାବାଲ୍ ଇଶ୍ବରତାଗେ କୃପାବିକ୍ଷା ମାଡ଼ାନଙ୍କ ଝେରଣ୍ ଗାଟି ଦାର୍ମାମ୍ ନାରୁଣ୍ ମିନ୍ଦେଣ୍ ଅଣ୍ ପ୍ରବୁ ଜିସୁକ୍ରିଷ୍ଟ ।

୨ ଅଣ୍ କ୍ରିଷ୍ଟ ନିଜେ ମାନାଦ୍ ବା ପୁରା ନାରୁଣ୍ ଜାତିତେ ପାପ୍ କ୍ଷମା ସେଙ୍ଗେ ଅଣ୍ ନିଜେ ବଲି ଆସ୍ ମିନ୍ଦେଣ୍ ।

୩ ଇଶ୍ବର ଗର୍ବତେ ଲେକାମ୍ ଆଦାନ୍ ସେଙ୍ଗେ ମାମେ ନିଜାମ୍ ଅଙ୍କ ପୁନ୍ତମ୍ ।

୪ ଯଦି ବେନ କେତିତନ୍ ଯେ, ଅଣ୍ ଇଶ୍ବରତିଙ୍କ ପୁନ୍ତନ୍, ଆଗେକ୍ ବା ଅଣ୍ ଅଙ୍କ ଗଟି ପାଲନ୍ ମାଡ଼ଣ୍, ଅଣ୍ ଝେରଣ୍ ମିତ୍ୟାବାଦି; ଆଦ୍ ସାରେଦାମ୍ ସଡ଼ତେ ପଡ଼ିନ୍ଦେ ଇଲା ।

୫ କିନ୍ତୁ ତୁବେନ ଅନ୍ ବାକ୍ୟ ପାଲନ୍ ମାଡ଼ିତଣ୍ଡ ଇଶ୍ବରତାଗ୍ ଅନ୍ୱାଦ୍ ଗର୍ତ୍ତେ ପାଲନ୍ ମାଡ଼ିତନ୍; ଇଶ୍ବରତେ ସେଙ୍ଗେ ଅନାଦ୍ ପ୍ରେମ ପାଏମ୍ ଆସ୍ମାନ୍ତନ୍ । ଜିଣ୍ଡେ ଇଶ୍ବରତେ ସତ୍ତା ମାନାଡ୍ ଯେ ଏକ୍ମାତ୍ରତ୍ତାଡ୍; ଇଦ୍ ନିଜାମ୍ତେ ବେଲାନ୍ ପୁନ୍ଦେ ପାର୍ତତାଡ୍ ?

୬ ବେନ ଇଶ୍ବରତାଗ୍ ମିନ୍ଦେନ୍ ଇଞ୍ଜ କେଡିତଣ୍ଡ, ଅଣ୍ଡ କ୍ରିଷ୍ଟ ଜିସୁନ୍ ଲେକାମ୍ ଜୀବନ୍ ଯାପନ୍ ମାଡ଼ିଣ୍ଡ ।

ପୁନାଦ୍ ଆଦେଶ୍

୭ ☆ ପ୍ରିୟ ସାଙ୍ଗନଡ଼ି ! ବେନ୍ ଗର୍ ବିଷୟତେ ଲେକାନଙ୍କ୍ ଆଦୁତାନ୍, ଆଦ୍ ମୁନେଙ୍କ୍ କଞ୍ଜ ପୁନାଦ୍ ଆୟ । ନାଗେ ଦିନାକଞ୍ଜ ମିଡ୍, ଆଦ୍ କେଞ୍ଜ ଖାଦୁଡିଡ୍, ମାମେ ପ୍ରଚାର ମାଡ଼ାନ୍ ଗଟିନେ ଆସ୍ତୁ ଆଦେଶ୍ ମିଡ୍, କେଞ୍ଜଡିଡ୍ ।

୮ ଇକ୍ଟେ ଇଦିଙ୍କ୍ ଅଣ୍ଡୟ ପୁନାଦ୍ ଆଦେଶ୍ ଲେକାମ୍ ଇଗେ ନାନ୍ ଲେକ୍ତାନ୍, ବାଡେଙ୍କ୍ ଇକ୍ଟେ ଇଦିନାଦ୍ ନିଜାମ୍ ମାଡର୍ କ୍ରିଷ୍ଟନାଗେ କାମ୍ ଆଡ୍ତେ ନୁ ମିଡ୍, ମିକା ନିଜେଡ୍ ଜିଣ୍ଡେତାଗ୍ ଅନାଦ୍ ନିଜାତାଦ୍ ଏକ୍ମା ମାଡ୍ତେ ପାର୍ତୁଡିଡ୍; ବାଡେଙ୍କ୍ ଇକ୍ଟେ ଇକାଡ୍, ମାୟିଆଦୁଡ୍ ନୁ ନିଜାତାଦ୍ ଖେସ୍ ଇଞ୍ଜେ ଆସମିନ୍ଦେ ।

୯ ଯଦି ବେନ କେଡ୍ କେ, ଇଦ୍ ଖେସ୍ତାଗ୍ ଅଣ୍ଡ ମିନ୍ଦେଣ୍ଡ, ବା ଅଣ୍ଡ ତାନ୍ ତାମୁଙ୍କ୍ ପାସକ ମାଡ୍ କେ, ଅଣ୍ଡ ସାରେଦାମ୍ ଇକାଡ୍ତାଗ୍ ମାନ୍ଦାନନ୍ ।

୧୦ ବେନ ଆୟି ନିଜେଡ୍ ତାମୁଙ୍କ୍ ପ୍ରେମ ମାଡ଼ିତନ୍, ଅଣ୍ଡ ଖେସିନାଗ୍ ମିନ୍ଦେଣ୍ଡ; ଅଣ୍ଡ ଆସାମ୍ ତାଲ୍ଗି ରାଲନ୍ ।

୧୧ ଇକ୍ଟେ ବେନ୍ ନାରୁଣ୍ଡ ତାନ୍ ତାମୁଙ୍କ୍ ଗୁଣା ମାଡ଼ିତନ୍, ଅନ୍ ଇକାଡ୍ତାଗ୍ ମିନ୍ଦେଣ୍ଡ, ଅଣ୍ଡ ଇକାଡ୍ ତାଗେ ବିଚରଣ ମାଡ଼ିତନ୍, ତାନ୍ ଆଦାନାଦ୍ ଆର୍ ଅଣ୍ଡ ପୁନ୍ଦାଙ୍କ୍ ପାର୍ତ୍ତଣ୍ଡ, ଆମାସ୍ ଇକାଡ୍ ଅଂକିଙ୍କ୍ କାନାଲ୍ ମାଡ଼ି ନେଃଏଡିଡ୍ ।

୧୨ ପିଲାନଡ଼ି ! ମିକିଙ୍କ୍ ନାନେ ଇଦ୍ ଚିଟି ଲେକ୍ତାନ୍, ବାଡେଙ୍କ୍ ଇକ୍ଟେ କ୍ରିଷ୍ଟନ୍ ପେଦେର୍ ସେଙ୍ଗେ ମିନ୍ଦାଦ୍ ପାୟ୍ କ୍ଷମା ଆଡ୍ତେ ।

୧୩ ଆନିଦାଦିଡ୍, ମିକିଙ୍କ୍ ଇଦ୍ ଚିଟି ଲେକ୍ତାନ୍; ବାଡେଙ୍କ୍ ଇକ୍ଟେ, ନାଗେ ଦିନାକଞ୍ଜ ବେନ ମିନ୍ଦେଣ୍ଡ; ଅଙ୍କ୍ ମିଡ୍, ପୁଡ୍ଡିଡ୍ । ଲେୟେ

ସମାଜ, ମିକିଙ୍କ ମିକା ଇଦ୍ ଚିଟି ଲେକୁତାନ୍, ବାତେଙ୍କୁଇକ୍ରେ ମିଡ୍, ପାପ୍ଆମ୍ବାତିଙ୍କ ଆରେମ୍ ମାଡେ ପାରୁତିଡ୍ ।

୧୪ ଆ ପିଲାନଡି ! ଇଦ୍ ଚିଟି ମିଇ ସେଙ୍ଗେ ଲେକୁତାନ୍, ବାତେଙ୍କୁଇକ୍ରେ ପରମ୍ ବାବାଙ୍କ ମିଡ୍ ପୁଡ୍ତିଡ୍ । ବାବାଲଡି ! ମିକିଙ୍କ ଇଦ୍ ଚିଟି ଲେକୁତାନ୍, ବାତେଙ୍କୁଇକ୍ରେ ବେନ ନାଗେ ଦିନାକଞ୍ଚ ମିନ୍ଦେଣ୍ଡ, ମିଡ୍ ଅଙ୍କ ପୁଡ୍ତିଡ୍ । ଲେୟେ ସମାଜ ! ମିକିଙ୍କ ଆନ୍ତେ ଇଦ୍ ଚିଟି ଲେକୁତାନ୍, ବାତେଙ୍କୁଇକ୍ରେ ମିଡ୍ ଶକ୍ତି ମାୟାନଡି, କ୍ରିଷ୍ଟନ୍ ବାକ୍ୟ ମିୟାଗ୍ ହୃଦୟତାଗ୍ ମିନ୍ଦେ ନୁ ମିଡ୍ ପାପ୍ଆମ୍ବାତିଙ୍କ ଆରା ମାଡ୍ତିଡ୍ ।

ଜଗତ୍ତିଙ୍କ ପ୍ରେମ ମାଡ୍ମାଟ୍

୧୫ ମିଡ୍ ଜଗତ୍ତିଙ୍କ ବା ଆଗେ ମାୟାନ୍ ବିଷୟ ସାରେତିଙ୍କ ପ୍ରେମ ମାଡ୍ମାଟ୍ । ଯଦି ବେନ ସଂସାର୍ତିଙ୍କ ପ୍ରେମ ମାଡ୍ତିଡ୍, ଆଲେକେ ଅନାଗ୍ ବାବାନ୍ ପ୍ରେମ ଇଲେ ।

୧୬ ବାତେଙ୍କୁଇଡକେ ମେନ୍ଦୁଲ୍ ଅବିଲାଷ, କଣ୍ଡେତାଦ୍ ଅବିଲାଷ ନୁ ଜାଗତିକ ଗର୍ବ, ସଂସାରତାଗ୍ ମାୟାନ୍ ଇଞ୍ଜୁସାରେ ବିଷୟ ବାବାନାଗାଙ୍କ ଆୟ, ମାତର୍ ସଂସାରତାଙ୍କ ତିଆର୍ ଆଡ୍ତେ ।

୧୭ ନାରୁନ୍ ଜଗତ୍ ନୁ ତାନ୍ ବେନ୍ ସାରେ ବିଷୟ କାମନା ମାଡ୍ତିଡ୍, ଆଦ୍ ସାରେ ବିନଷ୍ଟ ଗଟେମ୍ ଆଡ୍ତେ, ବାତେଙ୍କୁଇକ୍ରେ ବେନଆଇ ଇଶ୍ବରତେ ଇଛା ପାଲନ୍ ମାଡ୍ତିଡ୍, ଅଣ୍ଡ ବେସୁଙ୍କ୍ବା ଡଲଣ୍ଡ ।

କ୍ରିଷ୍ଟନ୍ ଶତ୍ରୁଡ୍

୧୮ ପିଲାନଡି ! ମାଡେଙ୍କ୍ ଦିନାମ୍ ଗାରେ ଏଞ୍ଜୁତେ । କ୍ରିଷ୍ଟନ୍ ଶତ୍ରୁଡ୍, ଝାଦାନାଦ୍ ସମୟ ଆଡ୍ତେ ଇଞ୍ଜ କେଞ୍ଜିଡ୍, କ୍ରିଷ୍ଟନ୍ ନାଗେ ଶତ୍ରୁଡ୍, ଇଞ୍ଜେ ତନ୍ଦୁତଡ୍; ଆସୁଙ୍କ୍ ମାଡେଙ୍କ୍ ଦିନାମ୍ ଗାରେ ଏଞ୍ଜୁତା ଇଞ୍ଜ ମାମେ ପୁଡ୍ତିଡ୍ ।

୧୯ ଇଡ୍ ମୁନେଙ୍କ୍ କଞ୍ଜ ମାନ୍ ମାନ୍ଦେତେ ନାରୁଡ୍ ଆୟଡ୍, ଅଦିନ୍ ସେଙ୍ଗେ ଇଡ୍ ମାନାଙ୍କ୍ ଝିଡ୍ସଡ୍, ମାନ୍ ମାନ୍ଦେ ଆସମାୟାନ୍ ଇଡ୍କେ, ଅଡ୍ ମାନ୍ତଡ୍ ମାନ୍ଦେଡ୍; ମାନାଗାଙ୍କ୍ ଯେକା ଆଦାନ୍ତଡ୍ ଅଡ୍ ମାନ୍ ମାନ୍ଦେତଡ୍ ଆୟଡ୍ ଇଞ୍ଜ ଟିକ୍ ପ୍ରମାନ୍ ଆସ୍ମିନ୍ଦେ ।

୨୦ ଇକ୍ରେ ମିଡ୍ କ୍ରିଷ୍ଟନ୍ ଅନୁଗ୍ରହ ତାଗାଙ୍କ୍ ପବିତ୍ରଆମ୍ବାନତଡ୍, ଅବିଷିକ୍ତ ଆସ୍ମିନ୍ଦେଡି; ମିଡ୍ ସାରେତଡ୍ ସଡ୍ ବାତେ ପୁଡ୍ତିଡ୍ ।

୨୧ ମିତ୍ ସତ୍ ପୁନଃକ୍ ନାନ ମିକିଙ୍କ ଇଦ୍ ଚିଟି ଲେକ୍ତନନ୍, ଆଦ୍ ଆୟ୍; ମାତର୍ ସ୍ପଷ୍ଟତେ ପୁଡ଼ିତ୍ ଇଞ୍ଜ ଲେକ୍ତନନ୍, ସତ୍ ତାଗାଙ୍କ ବେନେଆଇ ମିତ୍ୟା ତିଆର୍ ଆଦ୍ଦେ ପାର୍ଝ ଇଞ୍ଜ ପୁଡ଼ିତ୍ ।

୨୨ ଆଲେକ୍ ମିତ୍ୟାବାଦି ବେନ ? ଜିସୁଙ୍କ ବ୍ରାଣକର୍ତ୍ତାଲ୍ କ୍ରିଷ୍ଟ ଇଞ୍ଜ ବେନ ସ୍ବାକାର୍ ମାଡ଼ଣ୍ଡ, ଅଣ୍ ମିତ୍ୟାବାଦି । ମେଣ୍ଡେ ଅଣ୍ କ୍ରିଷ୍ଟନ୍ ଶତ୍ରୁ ନାରୁଣ୍ଡ, ବାବାଲ୍ ଇଶ୍ବର୍ ନୁ ତାନ୍ ମାର୍ ଜିସୁ, ଇର୍ଝୁଡ଼କ୍ ଆସ ଅଣ୍ ଗୁନା ମାଡ଼ିତଣ୍ ।

୨୩ ମାତର୍ ବେନ ମାରିଙ୍କ୍ ଗୁନା ମାଡ଼ିତନ୍, ଅଣ୍ ବାବାଙ୍କ୍ ମିକା ଗୁନା ମାଡ଼ିତନ୍; ବେନ ମାରିଙ୍କ୍ ଗ୍ରହନ୍ ମାଡ଼ିତନ୍, ଅଣ୍ ତାନ୍ ଜିଞ୍ଜେତେ ବାବାନ୍ ସଞ୍ଜା ମିକା ଏକେ ମାଡ଼ିତନ୍ ।

୨୪ ମୁନେଙ୍କକଞ୍ଜ ବେନ୍ ଗର୍ କେଞ୍ଜ ଖାଡ଼ିତ୍, ଆଦିନ୍ ସେଙ୍ଗେ ବିଶ୍ବସ୍ ଆସ୍ ମାନୁର୍ । ମୁନେଙ୍କ କଞ୍ଜ ବାତେ କେଞ୍ଜିତ୍, ଅଙ୍କ୍ ଯଦି ଲେକେଡ୍ ନେଏତେ ପାର୍ଡିତ୍, ଆଲେକେ, ମିତ୍ ବାବାଙ୍କ୍ ଇଶ୍ବର୍ ନୁ ତାନ୍ ମାରିନ୍ ତୋଡ଼୍ ସାରେଦିନାଡ଼୍ ସେଙ୍ଗ୍ କାଇଲି ମାନ୍ତିତ୍ ।

୨୫ ମାକିଙ୍କ୍ ଇଦ୍ ଦାନ ମାଡ଼ାନ୍ ସେଙ୍ଗେ ସ୍ବୟ୍ କ୍ରିଷ୍ଟ ପ୍ରତିଜ୍ଞା ମାଡ଼ି ମିନ୍ଦେନ୍ ଇଦ୍ଏକେ ଅନନ୍ତ ଜିଝୁନ୍ ।

୨୬ ବେନଡ଼୍ ମିକିଙ୍କ୍ ତିପାଲ୍ ମାଡ଼ାନଙ୍କ୍ ତେଷ୍ଟା ମାଡ଼ୁଡ଼, ଅଡ଼୍ ବିଷୟତେ ମିକିଙ୍କ୍ ସତର୍କ୍ ମାଡ଼ିଦୁତେ ।

୨୭ ମିକିଙ୍କ୍ କ୍ରିଷ୍ଟ ଜିସୁ ତାନ୍ ପବିତ୍ରଆତ୍ମାତେ ପରିପୁର୍ଣ୍ଣ ମାଡ଼ିମିନ୍ଦେନ୍ । ବେସୁଙ୍କ୍ ଆୟ୍ନା ଆଦ୍ ଆତ୍ମା ମୀଇ ହୃଦୟତାଗ୍ ବିରାଜ୍ମାନ, ଝେରେ ନାରୁଡ଼ାଗାଙ୍କ୍ ଶିକ୍ଷା ଗ୍ରହନ୍ ମାଡ଼ାନାଦ୍ ମିୟାଦ୍ ଦରକାର୍ ଇଲେ । ପବିତ୍ରଆତ୍ମା ମିକିଙ୍କ୍ ସାରେ ବିଷୟତେ ସତ୍ ଶିକ୍ଷା ଇଦ୍ତନ୍ ତାନ୍ ଶିକ୍ଷା ମିତ୍ ଆୟ୍ । ଆଦ୍ ଆତ୍ମାତେ ଶିକ୍ଷା ପାଲନ୍ ମାଡ଼ି କ୍ରିଷ୍ଟନ୍ ତଡ଼୍ କାଇଲି ମାନୁର୍ ।

୨୮ ଆ ପିଲାନଡ଼ି ! କ୍ରିଷ୍ଟନ୍ତଡ଼୍ କାଇଲି ମାନ୍ନୁର୍, ଆଲେକେ ଅନ୍ଧାଦ୍ ବେସୁଙ୍କ୍ ଆବିର୍ବାବ ଆଦ୍ତେ, ମାନାଡ଼୍ ଝେରେ ଇଲ୍ଝେ ଅନ୍ ମୁନେ ଆଦେ ପାର୍ଡତାଡ଼୍ ଆଞ୍ଜୁ ଦିନାକିନେ ମାନାଙ୍କ୍ ସିଗ୍ତଡ଼୍ ମିଞ୍ଜାନଙ୍କ୍ ଆୟ୍ ।

୨୯ ମାନାଡ଼, ପୁତ୍ରତାଡ଼, ଯେ, କ୍ରିଷ୍ଣ ପୁରାପୁରି ନ୍ୟାୟବାନ୍ । ଆଗେକ୍‌ବା ମାନାଡ଼, ପୁତ୍ରତାଡ଼, ଯେ, ବେନଡ଼, ସତ୍ କାମ୍ ମାଡ଼ିତଡ଼, ଅଡ଼, ଇଶ୍ବରତେ ମାରକ୍ ।

୩

ଇଶ୍ବରତେ ପିଲା

୧ ☆ ଇଶ୍ବର ମାନାଙ୍କ ବେସର୍ ପ୍ରେମ ମାଡ଼ତୁନ୍, ସୁଦୁର୍ ଚିନ୍ତା ମାଡ଼ତୁର୍ । ମାନ୍ ସେଙ୍ଗେ ଅନାଦ୍ ପ୍ରେମ ଇସର୍ ନାଗେ ଯେ, ମାନାଡ଼, ଅନ୍ ପିଲା ଲେକାମ୍ ଲେକା ଆଡ଼ତାଡ଼ । ନିଜାମ୍ ମାନାଡ଼, ଅନ୍ ପିଲାନଡ଼, ଆଦିନ୍ ସେଙ୍ଗେ ଜଗଡ଼ ଇଶ୍ବର ତିଙ୍କ୍ ପୁନ୍‌ଝାଙ୍କ୍, ମାନାଙ୍କ୍ ମିକା ଏସ୍ତେପାର୍‌ଝ ।

୨ ଆ ନା ପ୍ରିୟ ସାଙ୍ଗନଡ଼ି, ଇଞ୍ଜେ ମାନାଡ଼, ଇଶ୍ବରତେ ପିଲାନଡ଼, ବାତେଙ୍କ୍‌ଇକ୍ ବବିଷ୍ୟତ୍‌ତେ ବାତେ ଆଦ୍‌ତାଡ଼, ଇଦ୍ ଗର୍ ମେଣ୍ଡେ ପ୍ରକାଶ୍ ଆୟକେ । ଇସର୍ ମାତର୍ ମାନାଡ଼, ପୁତ୍ରତାଡ଼, ବେସୁଙ୍କ୍ କ୍ରିଷ୍ଣ ମେଣ୍ଡନ୍‌ଦାମ୍ ଝାଦ୍‌ତନ୍, ମାନାଡ଼, ଅନ୍‌ଝାଦ୍ ନିଜାତାଦ୍ ମକମ୍ ଉଡ଼ି ଅନ୍ ଲେକାମ୍ ଆଦ୍‌ତାଡ଼ ।

୩ ବେନଡ଼, କ୍ରିଷ୍ଣନାଗେ ଇଦ୍ ଆଗେ ମାଡ଼ିମିନ୍‌ଦେଡ଼, ଅଡ଼, କ୍ରିଷ୍ଣନ୍ ଲେକାମ୍ ନିଜେତିଙ୍କ୍ ପବିତ୍ର ମାଡ଼ି ନେଃଏତିତଡ଼ ।

୪ ବେନ ଆୟି ପାପ ମାଡ଼ିତନ୍, ଅଣ୍ ଇଶ୍ବରତେ ଆଜ୍ଞା ପାଲନ୍ ମାଡ଼ଣ୍, ବାତେଙ୍କ୍‌ଇକ୍ ଅପରାଦ୍ ଅର୍ତ୍ ଅଦୁଡ଼ ନିୟମ୍ ପାଲନ୍ ମାଡ଼୍‌ଝାଦ୍ ।

୫ ☆ ମାନାଦ୍ ପାପାମ୍ କାଞ୍ଜି ଆଦାନ୍ ସେଙ୍ଗେ କ୍ରିଷ୍ଣ ଝାସ୍‌ମାଡ଼ତନ୍ ମେଣ୍ଡେ ଅନାଗେ ପାପାମ୍ ଇଞ୍ଜ ବାଡ଼ ଇଲ୍‌ଝେ ମାଡ଼ିତେ ।

୬ ବେନ କ୍ରିଷ୍ଣନ୍ ତଡ଼୍ କାଲି ମାନ୍‌ତଣ୍, ଅଣ୍ ମେଣ୍ଡେ ପାପିନାରୁଣ୍ ଆଦେ ପାର୍‌ଝଣ୍ । ଇକ୍ ବେନ ପାପାମ୍‌ତାଗ୍ ମାନ୍‌ତଣ୍, ଅଣ୍ କ୍ରିଷ୍ଣଙ୍କ୍ ବେସୁଙ୍କ୍ ଉଡ଼ଣ୍, ବେସୁର୍ ଅଂକିଙ୍କ୍ ପୁନ୍‌ଣ୍ ।

୭ ଆ ପିଲାନଡ଼ି ! ବେନ ମିକିଙ୍କ୍ ପ୍ରତାରିତ ମାଡ଼୍‌ମାକିଣ୍ । ବେନ ଆୟି ସତ୍‌କାମ୍ ମାଡ଼ିତନ୍, ଅଣ୍ଡେକେ ମାତର୍ କ୍ରିଷ୍ଣନ୍ ଲେକାମ୍ ନିଜାତଣ୍ ଦାମ୍‌କ୍ ନାରୁଣ୍ ।

୮ ବେନ ପାପୀୟାନ୍ ମାଡ଼ିତଣ୍ଡୁ, ଅଣ୍ଡ ସୃଷ୍ଟିତେ ମୁନେଙ୍କ କଞ୍ଜ ପାପୀୟାନ୍ ମାଡ଼ତ୍ ଝାସମାନ୍ଦାନ୍ ଶୟତାନତେ ପେକେ ଆଦାନଣ୍ଡୁ । ଆ ଶୟତାନତେ କାମ୍ତିଙ୍ଗ୍ ଦ୍ରଂସ ମାଡ଼ାନ୍ ସେଙ୍ଗେ ଇଶ୍ବରତେ ମାର୍ ଝାସ୍ ମାଡ଼ତଣ୍ଡୁ ।

୯ ବେନ ପ୍ରକୃତତେ ଇଶ୍ବରତେ ମାର୍; ଅଣ୍ଡ ପାପୀୟାନ୍ ମାଡ଼ତ୍ତେ ମାନତଣ୍ଡୁ, ବାତେଙ୍କିକେ ଇଶ୍ବରତେ ପ୍ରକୃତି ଅନାଗ୍ ମିନ୍ଦେ । ଇଶ୍ବର ତାମ୍ ବାବାଲ୍, ଅଣ୍ଡ ପାପିଆସ୍ ମାନ୍ଦେ ପାଞ୍ଜଣ୍ଡୁ ।

୧୦ ଇଗେ ବେନ ଇଶ୍ବରତେ ପିଲା ନୁ ଶୟତାନ ପିଲା ଇଦ୍ ପ୍ରକାଶ୍ ଆଦତେ, ବେନ୍ ସତ୍‌କାମ୍ ମାଡ଼ଣ୍ଡୁ ବା ନିଜର୍ ବିଶ୍ବାସୀ ଏଲାଡ଼ତାମୁଙ୍କ୍ ପ୍ରେମ ମାଡ଼ଣ୍ଡୁ, ଅଣ୍ଡ ଇଶ୍ବରତେ ପିଲେ ଆୟଣ୍ଡୁ ।

ଝେରଣ୍ଡୁ ମେଣ୍ଡେ ଆରତିଙ୍କ୍ ପ୍ରେମ ମାଡ଼ାଟ୍

୧୧ ☆ଝେରଣ୍ଡୁ ମେଣ୍ଡେ ଅରତୁଙ୍କ୍ ପ୍ରେମ ମାଡ଼ାନଙ୍କ୍ ଆଦତେ, ଇଦ୍ ଗଟ୍ ମୁନେଙ୍କ୍ କଞ୍ଜ କେଞ୍ଜିତିଡ଼୍ ।

୧୨ ମାନାଡ଼୍ କୟିନ ଲେକାମ୍ ଆୟୁଝାଡ଼୍ । କୟିନ ଶୟତାନ ତଡ଼୍, କାଈଲି ନିଜର୍ ତାମୁଙ୍କ୍ ଆଞ୍ଜୁକତଣ୍ଡୁ । ତାନ୍ ତାମୁଙ୍କ୍ ଅଣ୍ଡ ବାଡ଼ତିଙ୍କ୍ ଆଞ୍ଜୁକତଣ୍ଡୁ ? ଅନ୍ ନିଜର୍ କାମ୍ ସତ୍ ଇଲ୍‌ଝେ ମାଡ଼ତେ; କିନ୍ତୁ ତାନ୍ ତାମୁଣ୍ଡୁ ସାରେଦାମ୍ ନେଲେକାମ୍ ମାଡ଼ମାଡ଼ଣ୍ଡୁ ।

୧୩ ଆ ନା ଏଲାଡ଼ତାମୁଣ୍ଡୁ ଇଦ୍ ଜଗତ୍‌ତେ ନାରୁଡ଼୍‌ୟେ ମିକିଙ୍କ୍ ବେନ ଗୁଣା ମାଡ଼ିତଡ଼୍, ଆଦିଙ୍କ୍ ଆଶୟ୍ୟ ଆୟମାଟ୍ ।

୧୪ ☆ଯଦି ମାମ୍ କ୍ରିଷ୍ଟିୟାନ୍ ଏଲାଡ଼ତାମୁଙ୍କ୍ ପ୍ରେମ ମାଡ଼ତୁଡ଼୍ ମାମେ ପୁଡ଼ତମ୍ ଯେ, ଇଞ୍ଜେ ମାନାଡ଼୍ ତଲାନାଦିଙ୍କ୍ ଅତିକ୍ରମ୍ ମାଡ଼ି ଜିଝେ ପାଏମ୍ ଆଡ଼ତାଡ଼୍ । ବେନ ପ୍ରେମ ମାଡ଼ଣ୍ଡୁ, ଅଣ୍ଡ ଇଞ୍ଜେ ଗାଲା ତଲାନାଗେ ମିନ୍ଦେଣ୍ଡୁ ।

୧୫ ବେନଆୟି ଆନ୍‌ଝେ କ୍ରିଷ୍ଟିୟାନ୍ ଏଲାଡ଼ତାମୁଙ୍କ୍ ଗୁଣା ମାଡ଼ିତନ୍, ଅଣ୍ଡ ଝେରଣ୍ଡୁ ହତ୍ୟାକାରୀ । ହତ୍ୟାକାରୀଙ୍କ୍ ଅନନ୍ତ ଜିଝେତାଗ୍ ଅଦିକାର୍ ଇଲେ ଇଞ୍ଜ ମିଡ଼୍ ପୁଡ଼ତିଡ଼୍ ।

୧୬ ମାନ୍ ସେଙ୍ଗେ କ୍ରିଷ୍ଟନାଦ୍ ଜିଝୁଣ୍ଡୁ ଇଡ଼ତାଗାଙ୍କ୍ ମାନାଡ଼୍ ପ୍ରେମ ଶିକ୍ଷା ମାଡ଼ତୁମ୍ । କ୍ରିଷ୍ଟିୟାନ୍ ଏଲାଡ଼ତାମୁଙ୍କ୍ ସେଙ୍ଗେ ଜିଝୁଣ୍ଡୁ ଇଦାନଙ୍କ୍ ମାନାଡ଼୍ ମିକା ତିଆର୍ ଆସ୍ ମାନ୍ଦାନାଦ୍ ସାୟେ ।

୧୭ ଯଦି ୱେରଣ୍ଡ ସାଉକାର ନାରୁଣ୍ଡ କ୍ରିଷ୍ଟିୟାନ୍ ଏଲାଡ଼ତାମୁଣ୍ଡତେ ଅବାବ୍ ଉଡ଼ି ମିକା ଅନ୍ ସେଙ୍ଗେ ଦୟା ମାଡ଼ଣ୍ଡ, ଅନ୍ ହୁଦୟତାଗ୍ ଇଶ୍ବରତେ ପ୍ରେମ ମିତ୍ରେ ଇଞ୍ଜ ଅଣ୍ଡ ବେଲାନ୍ କେତେ ପାର୍ତନ ?

୧୮ ପିଲାନ୍ତି, ମାନାଦ୍ ନିଜାମ୍ ସଡ଼ ପ୍ରେମ ଗତିତିର୍ଯ୍ୟାନାଗ୍ ନୁ ବାକ୍ୟ କେତାନାଦ୍ କେଞ୍ଜକେ ଆସରେ ଆୟ; ଆଦିଙ୍କ କାମ୍ଦାଗ୍ ତଅତାନଙ୍କ ଆଦତେ ।

ଇଶ୍ବରତେ ଉପାସନାତାଗ୍ ସଡ଼ ସାହାସ

୧୯ ମାନ୍‌ଝାଦ୍ ପାଡ଼ନ୍ତି ତଡ଼୍ ମାନାଡ଼୍ ସଡ଼ତେ ପିଲା ଇଞ୍ଜ ପୁନ୍ତାଡ଼୍ ।

୨୦ ଯଦି ମାନ୍ ମନ୍ ମାନାଙ୍କ ଦୋଷୀ ମାଡ଼ିଡ଼, ମାନାଦ୍ ମନେ ନେଏତାନାଦ୍ ଉଚିଡ଼ ଯେ, ଇଶ୍ବର ମାନ୍ ମାନ୍ତାଗାଙ୍କ ଗାଟି ପରୁ ନୁ ଅଣ୍ଡ ସାରେ ଗଟି ପୁଡ଼ତଣ୍ଡ ।

୨୧ ଆଦିଙ୍କ ନା ପ୍ରିୟ ନାରୁଡ଼ି ଯଦି ନିଜେଡ଼ ମନ୍ ମାନାଙ୍କ ଦୋଷୀ ମାଡ଼, ଇଶ୍ବରତେ ମୁନେ ମାନାଡ଼୍ ସଡ଼ସାହସୀ ଆଦେ ପାର୍ତାଡ଼୍ ।

୨୨ ମେଣ୍ଡେ ଅଙ୍କ ବାତେ ତାଲକିତାଡ଼, ଅଣ୍ଡ ଆଦ୍ ଦାନ ମାଡ଼ିତନ୍, ବାତେଙ୍କିକେ ମାନାଡ଼୍ ଅନ୍ ଆଦେଗ୍ ମାନେମ୍ ଅଦୁତାଡ଼; ମାନାଡ଼୍ କାମତଡ଼୍ ଅକିଙ୍କ ସନ୍ତୁଷ୍ଟ ମାଡ଼ୁତାଡ଼୍ ।

୨୩ ☆ମାନ୍ ସେଙ୍ଗେ ଅନାଦ୍ ଆଜ୍ଞା ଅଦୁଡ଼, ତାନ୍ ମାର୍ ଜିସୁ କ୍ରିଷ୍ଟନାଗେ ବିଶ୍ବାସ୍ ମାଡ଼ିକାଡ଼୍ ନୁ କ୍ରିଷ୍ଟନ୍ ଆଦେଗ୍ ଲେକାମ୍ ୱେରଣ୍ଡ ମେଣ୍ଡେ ଆରତିଙ୍କ ପ୍ରେମ ମାଡ଼ିକାଡ଼୍ ।

୨୪ ବେନ ଆୟି ଇଶ୍ବରତେ ଆଜ୍ଞା ପାଲନ୍ ମାଡ଼ିତନ୍, ଅଣ୍ଡ ଇଶ୍ବର ମାନ୍ତାନାଦ୍ ପୁନ୍ଦେପାର୍ଦତଣ୍ଡ, ଅନ୍ ହୁଦୟତାଗ୍ ଇଶ୍ବର ମାନ୍ତଣ୍ଡ । ଇଶ୍ବର ମାନ୍ ହୁଦୟତାଗ୍ ମାନ୍ତଣ୍ଡ, ଇଦ୍ ଗର୍ ମାନାଙ୍କ ଇଡ଼ତେ ଅନାଦ୍ ଆମ୍ ସାହାଯ୍ୟତେ ମାନାଡ଼୍ ପୁନ୍ଦାନଙ୍କ ପାର୍ଦୁତାଡ଼୍ ।

୪

ଇଶ୍ବରତେ ଆମ୍ ନୁ ମିର୍ ଆମ୍

୧ ପ୍ରିୟ ସାଙ୍ଗନଡ଼ି ! ଇଶ୍ବରତେ ଆମ୍ ପାହେମ୍ ଆସମିତ୍ରେ ଇଞ୍ଜ ବେନଡ଼୍ କେଡୁତଡ଼, ଅଡ଼୍ ସାରେତଡ଼୍ ବିଶ୍ବାସ୍ ମାଡ଼ମାର୍; ଅଡ଼୍ ପାଃଏମ୍ ଆସମାନ୍ଦାନ୍ ଆମ୍, ସଡ଼ତେ ଇଶ୍ବରତାଗେ ଆଗାଡ଼୍ କି

ଆୟ, ମୁନେ ପରିକ୍ଷା ମାଡ଼ି ଉଡ଼ାଟ୍ । ବାତେଙ୍କ ଇକ୍ରେ ଇଞ୍ଜେ ନାଗେ ବଣ୍ଟବାବବାଦିଡ଼୍ ସାରେତାକ୍ ବିଚରଣ୍ ମାଡ଼ୁଡ଼ୁ ।

୭ ଅଡ଼ ଇଶ୍ବରତେ ଆମ୍ବା ପାହେମ୍ ଆସ୍ମିନେଡ଼୍ କି ଇଲେ, ତାନାଦ୍ ପୁନ୍ଦାନାଦ୍ ଉପାୟ୍ ଅଦୁଡ଼, ବେନ୍ ନାରୁନାଗେ ଇଶ୍ବରତେ ଆମ୍ବା ଅଦିଷ୍ଟତ, ଅଣ୍ଟ କୁଲେମ୍ ଲେଙ୍ଗ୍ ଦେ ସ୍ବାକାର୍ ମାଡ଼ିତନ୍ ଯେ, ଜିସୁ କ୍ରିଷ୍ଟ ନାରୁନ୍ ଲେକାମ୍ ଝାସ୍ମାଡ଼ତଣ୍ ।

୮ କିନ୍ତୁ ବେନ୍ ଜିସୁନ୍ ବିଷୟତେ ଇଦ୍ ଗଟ୍ ସ୍ବାକାର୍ ମାଡ଼ଣ୍, ଅଣ୍ଟ ବେସୁଙ୍କ୍ ମିକା ଇଶ୍ବରତେ ଆମ୍ବା ଲାବ୍ ମାଡ଼ଣ୍, କ୍ରିଷ୍ଟନ୍ ଶତ୍ରୁନାଗାଙ୍କ୍ ଅଣ୍ଟ ଆଦ୍ ଆମ୍ବା ପାଏମ୍ ଆଡ଼ତଣ୍, ଇଦ୍ ଆମ୍ବାତେ ଆଗମନ୍ ବିଷୟତେ ମିଡ଼୍ କେଞ୍ଜିଡ଼୍ ଆଦ୍ ଇଞ୍ଜେ ଇଦ୍ ଜଗଡ଼ତାଗେ ମିନ୍ଦେ ।

୪ କିନ୍ତୁ ପିଲାନ୍ତି ! ମିଡ଼୍ ଇଶ୍ବରତେ ପିଲା । ଆ ବୁସା ମାଡ଼ାନ୍ ବାବବାଦୀଡ଼କ୍ ମିଡ଼୍ ଆରା ମାଡ଼ିଡ଼, ବାତେଙ୍କ୍ ଇକ୍ ମାଲ୍ ହୁଦୟତାଗ୍ ବାସେ ମାଡ଼ିମାନ୍ଦାନ୍ ଇଶ୍ବରତେ ଆମ୍ବା, ସଂସାରତେ ନାରୁଡ଼୍ ଆମ୍ବାତାଗାଙ୍କ୍ ଅଦିକ୍ ଶକ୍ତିଶାଳି ।

୫ ବୁସା ମାଡ଼ାନ୍ ବାବବାଦୀଡ଼୍ ସଂସାରତେ ଗଟି କେସ୍ ଉଡୁଡ଼, ନୁ ସଂସାରିକ୍ ନାରୁଡ଼୍ ଅଡ଼ ଗଟି କେଞ୍ଜିଡ଼୍ ।

୬ କିନ୍ତୁ ମାନାଡ଼୍ ଇଶ୍ବରତେ ନାରୁଡ଼୍ । ବେନ ଆୟି ଇଶ୍ବରତିଙ୍କ୍ ପୁଡ଼ତଣ୍, ଅଣ୍ଟ ମାନ୍ ସେଙ୍ଗେ କେଞ୍ଜିତନ୍ । ବେନଡ଼୍ ଇଶ୍ବରତଡ଼୍ ଆୟଡ଼୍, ଅଡ଼ ମାନ୍ ଗଟି କେଞ୍ଜିଡ଼୍ । ସଡ଼ ଆମ୍ବା ନୁ ମିଡ଼୍ ଆମ୍ବା ଲୋପେ ଇଦ୍ ଝେରେ ମାନାଡ଼୍ ଉଡେ ପାର୍ତାଡ଼୍ ।

ଇଶ୍ବର ପ୍ରେମମୟ

୭ ଆ ନା ପ୍ରିୟ ସାଙ୍ଗନ୍ତି ! ନିଜର୍ ନିଜର୍ ଲୋପେ ପ୍ରେମ ମାଡ଼ାଟ୍, ବାତେଙ୍କ୍ ଇକ୍ରେ ପ୍ରେମ ଇଶ୍ବରତାଗାଙ୍କ୍ ଝାଡ଼ତେ । ବେନନ୍ ହୁଦୟତାଗ୍ ପ୍ରେମ ମିନ୍ଦେ, ଅଣ୍ଟ ଇଶ୍ବରତେ ପିଲା, ଅଣ୍ଟ ଇଶ୍ବରତିଙ୍କ୍ ପୁଡ଼ତଣ୍ ।

୮ ବେନ ପ୍ରେମ ମାଡ଼ଣ୍, ଅଣ୍ଟ ଇଶ୍ବରତିଙ୍କ୍ ପୁନଣ୍, ବାତେଙ୍କ୍ ଇକ୍ରେ ଇଶ୍ବର ପ୍ରେମମୟ ।

୯ ଇଶ୍ବର ତାନ୍ ଝେରଣ୍ଡେ ଇଞ୍ଜ ମାର୍ ଜିସୁଙ୍କ୍ ଜଗଡ଼ତାଗ୍ ରସ୍ମିକା ମାନ୍ ସେଙ୍ଗେ ଅନାଦ୍ ପ୍ରେମ କେସ୍ ମିନ୍ତେନ୍, ଆ ଜିସୁନ୍ ତଡ଼୍ ମାନ୍ଡ଼୍, ଅନନ୍ତ ଜିଝେ ପାଏମ୍ ଆଦ୍ତାଡ଼୍ ।

୧୦ ଇଦ୍ କେ ନିଜାତାଦ୍ ପ୍ରେମ, ମାନାଡ଼୍, ଇଶ୍ବରତିଙ୍କ୍ ପ୍ରେମ ମାଡ଼୍ଝାଡ଼୍, ଅଣ୍ ମାନାଙ୍କ୍ ପ୍ରେମ ମାଡ଼ି, ମାନ୍ ପାପାମ୍ କାଞ୍ଜି ଆଦାନ୍ ସେଙ୍ଗେ ତାନ୍ ମାରିଙ୍କ୍ ରଅତଣ୍ ।

୧୧ ଆ ନା ପ୍ରିୟ ସାଙ୍ଗନଡ଼ି, ଯଦି ଇଶ୍ବର ମାନାଙ୍କ୍ ଇଦ୍ଲେକାମ୍ ପ୍ରେମ ମାଡ଼ତନ୍, ମାନାଡ଼୍ ମିକା ନିଜେ ନିଜେତିଙ୍କ୍ ପ୍ରେମ ମାଡ଼ାନ୍ ଦରକାର୍ ।

୧୨ ☆ବେନ ବେସୁଙ୍କ୍ ଇଶ୍ବରତିଙ୍କ୍ ଉଡ଼ଣ୍, କିନ୍ତୁ ମାନାଡ଼୍ ଯଦି ନିଜେ ନିଜେତିଙ୍କ୍ ପ୍ରେମ ମାଡ଼ିତାଡ଼୍, ଇଶ୍ବର ମାନାଗେ ମାନ୍ତଣ୍ ନୁ ମାନାଗେ ଅନାଦ୍ ପ୍ରେମ ପୁରାପୁରି ଲାବ୍ ମାଡ଼ିତଣ୍ ।

୧୩ ମାନାଡ଼୍ ଯେ ଇଶ୍ବର ତଡ଼୍ କାଲି ନୁ ଇଶ୍ବର ମାନ୍ ହୃଦୟତାଗ୍ ମାନ୍ତନ୍, ଇଦିନ୍ ନିଦର୍ଶନ୍ ଅଦୁଡ଼୍, ଅଣ୍ ପବିତ୍ରଆତ୍ମାଙ୍କ୍ ମାନାଙ୍କ୍ ଇଡ଼ତନ୍ ।

୧୪ ଜଗତ୍ତେ ଡ୍ରାଣକର୍ତ୍ତାଲ୍ ଲେକାମ୍ ଇଶ୍ବର ରସ୍ମାନ୍ଦାନ୍ ତାନ୍ ମାରିଙ୍କ୍ ନିଜର୍ କଣ୍ଟେତେ ଉଡ଼ି ଅନ୍ ବିଷୟତେ ମାମେ ଝେରେତଡ଼କିଙ୍କ୍ କେଡୁତମ୍ ।

୧୫ ବେନାୟି ଜିସୁଙ୍କ୍ ଇଶ୍ବରତେ ମାର୍ ଇଞ୍ଜ ବେନ ସ୍ବାକାର୍ ମାଡ଼ିତନ୍, ଇଶ୍ବର ଅନ୍ ହୃଦୟତାଗ୍ ମାନ୍ତନ୍ ନୁ ଅଣ୍ ଇଶ୍ବରତାଗ୍ ମିନ୍ଦେଣ୍ ।

୧୬ ମାନ୍ ସେଙ୍ଗେ ଇଶ୍ବରତେ ପ୍ରେମତାଦ୍ ନିଜାମ୍ ମାମେ ପୁଡ଼ତମ୍, ଇଗେ ମାୟାଦ୍ ପୁରା ବିଶ୍ବାସ୍ ମିନ୍ଦେ । ଇଶ୍ବର ପ୍ରେମମୟ । ବେନନ୍ ଜିଝେତାଗ୍ ପ୍ରେମ ବର୍ତ୍ ଆସ୍ ମିନ୍ଦେ, ଅଣ୍ ଇଶ୍ବର ତଡ଼୍ କାୟଲ୍ତଣ୍ ନୁ ଇଶ୍ବର ଅନାଗ୍ ମିନ୍ଦେଣ୍ ।

୧୭ ଇଶ୍ବରତେ ପାକେ ଜିଝୁଣ୍ ବାଦକାନ୍ ତଡ଼୍ ମାନ୍ ଜିଝେତାଗ୍ ଇଦ୍ ପ୍ରେମ ସିଦ୍ ଆଡ଼କେ, ମାମେ ଝେର୍ଝେକଞ୍ଜ୍ ବିଚାର୍ ଦିନେ ମୁନେ ଝାଦେପାର୍ଦତାଡ଼୍, ବାତେଙ୍କ୍‌ଇକ୍ଟେ ଇଦ୍ ଜଗତ୍ତେ ମାଞ୍ଜ ମାମେ କ୍ରିଷ୍ଟନ୍ ଲେକାମ୍ ଜିବନ୍ ଜାପନ୍ ମାଡ଼ୁତମ୍ ।

୧୮ ବେଗେ ପ୍ରେମ ମାନ୍ତେ, ଆଗେ ଝେର୍ରେ ମାନ । ସାୟେ ପ୍ରେମ ସାରେ ଝେର୍ରେ ଦୁରାମ୍ ମାଡ଼ିଡ଼୍ । ବେନ ଝେର୍ତଣ୍, ଅନାଗେ ପ୍ରେମ ସଫଳ ଆୟ୍; ବାତେଙ୍କ୍‌ଇକ୍ଟେ ଦଣ୍ ଦରକାନାଦ୍ ଝେର୍ରେ ଅନାଦ୍ ମେଣ୍ଟେ ମିନ୍ତେ ।

^{୧୯} ଅଣ୍ଟା ମୁନେନ୍ ମାନାଙ୍କ ପ୍ରେମ ମାଡ଼ତାଙ୍କ ମାନାଡ଼ ପ୍ରେମ ମାଡ଼ାନଙ୍କ ନାଡ଼ସ୍ତମ୍ ।

^{୨୦} ଯଦି ବେନ କେତିତନ୍ ଯେ, ଅଣ୍ଟା ଇଶ୍ବରତିଙ୍କ ପ୍ରେମ ମାଡ଼ତୁଣ୍ଟ, ଆଲୋକ ଅଣ୍ଟା ତାନ୍ ବିଶ୍ବାସୀ ଏଲାଡ଼ତାମୁଙ୍କ ଗୁଣା ମାଡ଼ିତଣ୍ଟ, ଅଣ୍ଟା ମିତ୍ୟାବାଦି । ବାତେଙ୍କଇଡ଼କେ ନିଜାମ୍ ଉଡ଼ ମାନ୍ଦାନ୍ ଝେରଣ୍ଟ ତାମୁଙ୍କ ବେନ ଆୟି ସ୍ନେହ ମାଡ଼େ ପାର୍ବନ୍, ଅଣ୍ଟା ତନ୍ଦ୍ରେ ଇଶ୍ବରତିଙ୍କ ବେସୁଙ୍କ ପ୍ରେମ ମାଡ଼େ ପାର୍ବନ୍ ।

^{୨୧} ଇଦ୍ ଆଦେଶ୍ କ୍ରିଷ୍ଟ ମାକିଙ୍କ ଇଡ଼ତନ୍, ବେନ ଇଶ୍ବରତିଙ୍କ ପ୍ରେମ ମାଡ଼ିତନ୍, ଅଣ୍ଟା ନିଜାମ୍ ତାନ୍ ବିଶ୍ବାସୀ ଏଲାଡ଼ତାମୁଙ୍କ ପ୍ରେମ ମାଡ଼ିତନ୍ ।

୫

ଜଗତ୍ତେ ପରୁ ଜିଡ଼ାନାଦ୍

^୧ ବେନ ଜିସୁଙ୍କ କ୍ରିଷ୍ଟ ଇଞ୍ଜ ବିଶ୍ବାସ୍ ମାଡ଼ିତଣ୍ଟ, ଅଣ୍ଟା ଇଶ୍ବରତେ ମାର୍ । ବେନ ଆୟି ଝେରନ୍ ବାବାଙ୍କ ପ୍ରେମ୍ ମାଡ଼ିତନ୍, ଆ ବାବାନ୍ ମାରିଙ୍କ ମିକା ଅଣ୍ଟା ସ୍ନେହ ମାଡ଼ିତନ୍ ।

^୨ ଯଦି ମାମେ ଇଶ୍ବରତିଙ୍କ ପ୍ରେମ ମାଡ଼ି ଅନାଦ୍ ଆଜ୍ଞା ପାଲନ୍ ମାଡ଼ିତାଡ଼ ଇଶ୍ବରତେ ପିଲାନ୍ ସେଙ୍ଗେ ମାୟାଦ୍ ପ୍ରେମ ମିନ୍ଦେ ଇଞ୍ଜ ପୁନ୍ଦାଙ୍କ ଆଦତେ ।

^୩ ☆ ଇଶ୍ବରତେ ସେଙ୍ଗେ ମାନାଦ୍ ପ୍ରେମ ମିନ୍ଦେ, ଇଦିନ୍ ଅର୍ତ୍ତ, ମାନାଡ଼୍ ଅନ୍ ଆଜ୍ଞା ପାଲନ୍ ମାଡ଼ିତାଡ଼୍ । ଅନ୍ ଆଜ୍ଞା ପାଲନ୍ ମାଡ଼ାନାଦ୍ ଗାଟି କଷ୍ଟ ଇଲେ,

^୪ ବାତେଙ୍କଇକ୍ଟେ ଅନ୍ ପିଲା ଇଦ୍ ଜଗତ୍ତିଙ୍କ ଆରା ମାଡ଼ାନଙ୍କ ଶକ୍ତି ପାଏମ୍ ଆଡ଼ତଡ଼୍ । ବିଶ୍ବାସ୍ ଶକ୍ତିତେ ମାମେ ଜଗତ୍ତେ ପରୁ ଜିଡ଼ାନାଦ୍ ଲାବ୍ ମାଡ଼େ ପାର୍ତାଡ଼୍ ।

^୫ ଇଦ୍ ଜଗତିଙ୍କ ବେନ ଆରା ମାଡ଼େ ପାର୍ତଣ୍ଟ ? ଜିସୁ ଇଶ୍ବରତେ ମାର୍ ଇଞ୍ଜ ବେନ ବିଶ୍ବାସ୍ ମାଡ଼ିତନ୍, ଅଣ୍ଟେକେ ଜଗତ୍ତିଙ୍କ ଜିଡ଼େ ପାର୍ଦଦତଣ୍ଟ ।

ଜିସୁ କ୍ରିଷ୍ଟନ୍ ସମ୍ପର୍କତେ ସାକ୍ଷୀ

୭ ଜିସୁ କ୍ରିଷ୍ଟ ଇଶ୍ବରତେ ମାର୍ ଇଞ୍ଜ ବାପ୍ତିସ୍ମ ତଡ଼୍ ନୁ ନିଜର୍ ନେତୁର୍ ତଡ଼୍ ନାରୁଡ଼ାଦ୍ ପରିତ୍ରାଣ ସାଦନ୍ ମାଡ଼ତଣ୍ । ମାତର୍ ଏରତଡ଼୍ ଆୟ୍ ମାତର୍ ରେଣ୍ଡିଆସ୍ ଏର୍ ନୁ ନେତୁର୍ ଇସ୍ ଖାସ୍ମାଡ଼ତଣ୍ । ଆମ୍ ଆନ୍ତେ ଇଦିନାଦ୍ ସାକ୍ଷୀ ଇଦୁତା । ବାଡ଼ତିଙ୍କିକ୍ରେ ପରମାଆମ୍ କେ ସଡ଼ ।

୮ ମେଣ୍ଡେ ଇଝୁ ମୁଣ୍ଡିନ୍ ସାକ୍ଷ୍ୟ ଅଣ୍ଡୟ୍ ସମାନ୍ ।

୯ ଆମ୍, ଏର୍ ନୁ ନେତୁର୍, ଇଝୁ ମୁଣ୍ଡିନ୍ ସାକ୍ଷ୍ୟ ଅଣ୍ଡୟ୍ ।

୧୦ ମାମେ ଯଦି ନାରୁନ୍ ସାକ୍ଷ୍ୟ ଗ୍ରହନ୍ମାଡ଼କେ ଆଲେକ୍ ଇଶ୍ବରତେ ସାକ୍ଷ୍ୟ ଆଦିନାଗାଙ୍କ୍ ଶ୍ରେଷ୍ଠ, ମେଣ୍ଡେ ଇଶ୍ବରତେ ସାକ୍ଷ୍ୟ ଇଦ୍ ଯେ ଅଣ୍ଡ ତାନ୍ ମାରିନ୍ ବିଷୟତେ ସାକ୍ଷ୍ୟ ଇଡ଼ତନ୍ ।

୧୧ ବେନ ଇଶ୍ବରତେ ମାରିନାଗ୍ ବିଶ୍ବାସ୍ ମାଡ଼ିତଣ୍, ଅଣ୍ଡ ନିଜର୍ ହୃଦୟତାଗ୍ ଇଦ୍ ସାକ୍ଷ୍ୟ ପାଏମ୍ ଆଡ଼ତଣ୍, ବେନ ଇଶ୍ବରତେ ସାକ୍ଷ୍ୟ ବିଶ୍ବାସ୍ ମାଡ଼ଣ୍, ଅଣ୍ଡ ଅଂକିଙ୍କ୍ ମିର୍ ଇଞ୍ଜ କେଡ଼ତଣ୍, ବାଡେଙ୍କିକ୍ରେ ଇଶ୍ବର ନିଜେ ମାରିନ୍ ବିଷୟତେ ବେନ ସାକ୍ଷ୍ୟ ଇସ୍ମିନ୍ଦେଣ୍, ଆଗେ ଅଣ୍ଡ ବିଶ୍ବାସ୍ ମାଡ଼ଣ୍ ।

୧୨ ଆଦ୍ ସାକ୍ଷ୍ୟ ଆଡ଼ତେ, ଇଶ୍ବର ମାନାଙ୍କ୍ ଅନନ୍ତ ଜିଝୁନ୍ ଇଡ଼ତନ୍; ମେଣ୍ଡେ ଆଦ୍ ଜିଝୁଣ୍ଡ ତାନ୍ ମାରିନାଗେ ମିନ୍ଦେ ।

୧୩ ବେନ ମାରିଙ୍କ୍ ପାହେମ୍ ଆଡ଼ତନ୍, ଅଣ୍ଡ ଜିଝୁଣ୍ଡ ପାହେମ୍ ଆଡ଼ତନ୍; ବେନ ଇଶ୍ବରତେ ମାରିଙ୍କ୍ ପାହେମ୍ ଆୟନ୍, ଅଣ୍ଡ ଜିଝୁଣ୍ଡ ପାହେମ୍ ଆୟଣ୍ ।

ସାରେ ଦିନାଡ଼ ଜିଝୁନ୍

୧୪ ମିକିଙ୍କ୍ ଇଦ୍ ଚିଟି ଲେକୁତାନ୍, ସାରେଦିନଡ଼ ଜିଞ୍ଜେତେ ଅଦିକାର୍ ଇଞ୍ଜ ମିଡ଼୍ ବେଲାନ୍ ପୁନ୍ତିଡ଼, ବାଡେଙ୍କିକ୍ରେ ଇଶ୍ବରତେ ମାରିନାଗେ ମୀଇ ବିଶ୍ବାସ୍ ମିନ୍ଦେ ।

୧୫ ମେଣ୍ଡେ ମାନାଡ଼୍ ବେସୁର୍ ଅନାଦ୍ ଇଚ୍ଛା ଲେକାମ୍ ବାଡ଼ଆଇ ପ୍ରାର୍ଥନା ମାଡ଼ିତାଡ଼, ଆସୁର୍ ଅଣ୍ଡ ମାନାଦ୍ ଆଦ୍ ପ୍ରାର୍ଥନା କେଞ୍ଜିତନ୍, ଅନ୍ ମୁନେ ମାନାଦ୍ ଇଦ୍ ସାହାସ୍ ମିନ୍ଦେ ।

୧୬ ମେଣ୍ଡେ ମାନାଡ଼୍ ଅନ୍ ଗାରେ ବାଡ଼ଆୟି ପ୍ରାର୍ଥନା ମାଡ଼କେ, ଆଦ୍ ଅଣ୍ଡ କେଞ୍ଜିତନ୍ ଇଞ୍ଜ ଯଦି ମାନାଡ଼୍ ପୁଡ଼ତାଡ଼, ଆଲେକ୍ ଅନ୍ ମିନେ

ବାଡ଼ ପ୍ରାର୍ଥନା ମାଡ଼ତାଡ଼, ଆଖୁ ସାରେ ପାହେମ୍ ଆଡ଼ତାଡ଼, ଇଦ୍ ମିକା ପୁଡ଼ତାଡ଼ ।

^{୧୭} ଯଦି ମୀଇ ଝେରଣ୍ଡ ବିଶ୍ୱାସୀ ଏଲାଡ଼ତାମୁଣ୍ଡ ପାପ ମାଡ଼ମାନ୍ଦାନ୍ ଉଡ଼ିଡ଼ିଡ଼, ମେଣ୍ଡେ ଆଦ୍ ପାପ୍ ତଲାନାଦ୍ ଆୟ୍, ଅନ୍ ସେଙ୍ଗେ ଇଶ୍ୱରତିଙ୍କ ପ୍ରାର୍ଥନା ମାଡ଼ାଟ୍ ମେଣ୍ଡେ ଇଶ୍ୱର ଅଂକିଙ୍କ୍ କ୍ଷମା ଇସ୍ ରକ୍ଷା ମାଡ଼ିତଣ୍ଡ । ବେନଡ଼ାଝୁ ପାପାମ୍ ତଲାନ୍ ଲେକାମ୍, ଆଦ୍ ବିଷୟତେ ନାନ୍ ଇଶ୍ୱରତିଙ୍କ ପ୍ରାର୍ଥନା ମାଡ଼ାନଙ୍କ୍ କେଲନ୍ ।

^{୧୮} ସାରେ ଅଦର୍ମ ପାପାମ୍ ଆଦ୍ତେ, କିନ୍ତୁ ସୁାରେ ପାପାମ୍ ତଲାନାଦ୍ ଆୟ୍ ।

^{୧୯} ବେନ ଆୟ୍ ଇଶ୍ୱରତାଗାଙ୍କ୍ ପୁଟ୍ତଣ୍ଡ ଅଣ୍ଡ ପାପାମ୍ତାଗ୍ ମାନଣ୍ଡ । ବାତେଙ୍କ୍‌ଇକ୍ ଇଶ୍ୱରତେ ମାର୍ ଅଙ୍କ୍ ରକ୍ଷା ମାଡ଼ିତଣ୍ଡ ଶୟତାନ୍ ଅନାଦ୍ କ୍ଷତି ମାଡ଼େ ପାରୁଝ ।

^{୨୦} ମାନାଡ଼ ଇଶ୍ୱରତାଗାଙ୍କ୍ ପୁଟ୍ତାଡ଼ ନୁ ସାରେ ଜଗଡ଼ ପାପାମ୍ତେ ଅଦିନ୍ତାଗ୍ ମିନ୍ଦେ, ଇଦ୍ ମାନାଡ଼ ପୁଡ଼ତାଡ଼ ।

^{୨୧} ମାମେ ପୁଡ଼ତମ୍, ଇଶ୍ୱରତେ ମାର୍ ଇଗେ ଝାସ୍ ସଡ଼ ଇଶ୍ୱରତେ ସଡ଼ ଏକେ ମାଡ଼ାନଙ୍କ୍ ମାନାଙ୍କ୍ ଜ୍ଞାନ୍ ଇସ୍‌ମିନ୍ତେନ୍ । ମାନାଡ଼ ସଡ଼ ଇଶ୍ୱର ନୁ ଅନ୍‌ମାର୍ ଜିସୁ କ୍ରିଷ୍ଟନ୍ ତଡ଼୍ କାଈଲି ମାନ୍ଦାନ୍ ଜିଝେ ବାଦ୍‌କୁତାଡ଼ । ଅଣ୍ଡେ କେ ସଡ଼ ଇଶ୍ୱର ନୁ ଅଣ୍ଡେ କେ ସାରେଦିନାଡ଼ ଜିଝେ ।

^{୨୧} ଆ ପିଲାନଡ଼ି, ଆସଡ଼ ଦେୟାକିନାଗାଙ୍କ୍ ଯେକା ମାନୁଟ୍ ।

ପୁନାବ୍ ଆର୍ବ୍
The New Testament in the Koya language of India:
ପୁନାବ୍ ଆର୍ବ୍ (Bible)

copyright © 2020 The Word for the World International and Koya Translation Samithi, Malkangiri, Odisha

Language: (Koya)

Contributor: The Word for the World South Asia

ପୁନାବ୍ ଆର୍ବ୍
ପୁନାବ୍ ନିୟମ୍ , 2020

The New Testament in Koya Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-07

PDF generated using Haiola and XeLaTeX on 6 May 2025 from source files dated 7 May 2025

72ff5787-bb80-584b-a1a0-0acd8a2fefae